

Program 1Malaysia di kampus

Harian metro 16/05/2010

M/S 15A

BTN sedia kongsi kos

>>Oleh Mahaizura Abd Malik

am@hmetro.com.my

JOHOR BAHRU: Biro Tata-negara (BTN) bersedia memberi peruntukan kepada semua institusi pengajian tinggi awam (IPTA) dan swasta (IPTS) bagi mengadakan seminar atau program berunsurkan 'Gagasan 1Malaysia' untuk manfaat masyarakat pelbagai lapisan di negara ini.

Timbalan Menteri di Jabatan Perdana Menteri, Datuk Ahmad Maslan, berkata galakan yang diberikan itu memberi peluang kepada mahasiswa supaya mendekati masyarakat dengan mengadakan program yang bermanfaat untuk semua.

Beliau berkata, inisiatif itu seiring dengan saranan kerajaan menggalakkan mahasiswa berbakti kepada masyarakat secara tidak langsung membantu rapatkan hubungan komunikasi dua hala antara masyarakat.

"Ini penting, bukan pemimpin saja berperanan, malah kami mahu mahasiswa juga tampil mendekati masyarakat supaya mewujudkan idea kreatif.

"Justeru itu, kami menggalakkan mahasiswa rebut peluang itu terutamanya membabitkan prog-

ram di kawasan luar bandar untuk kebaikan semua," katanya.

Ahmad yang juga Ahli Parlimen Pontian, berkata menerusi hasil kajian yang dijalankan mahasiswa itu, secara tidak langsung dapat meningkatkan ekonomi negara ini.

"Saya ambil contoh baru-baru ini, pelajar Universiti Teknologi Malaysia (UTM) membuat kajian mengenai nanas di Pontian dan menerusi kajian itu, timbul idea menghasilkan bahan makanan, kertas selain baja.

"Justeru, pada pendapat saya mahasiswa perlu membabitkan diri dalam program seumpama itu kerana ia adalah sesuatu yang bermanfaat," katanya selepas menghadiri Malam Puncak Perdana ke-8 UTM di sini, kelmarin.

Ahmad berkata, kerajaan merancang untuk mengadakan Seminar 1Malaysia di semua IPTA dan IPTS dalam tempoh terdekat ini bertujuan menerapkan kefahaman di kalangan mahasiswa.

Katanya, seminar anjuran BTN dengan membabitkan IPTA dan IPTS terpilih daripada 500 siri seminar BTN yang akan memperuntukkan sebahagian daripadanya untuk seminar berkenaan.